

17/04/2001

e-Learning 2001 tumpu pelaksanaan multimedia, ICT dalam pembelajaran

KUALA LUMPUR, Isnin - Pameran Kebangsaan Mengenai Pembelajaran Elektronik 2001 dan Pendidikan Teknologi Maklumat (IT) (e-Learning 2001) akan memfokuskan pelaksanaan ICT dan multimedia dalam pengajaran, pembelajaran serta latihan dalam ekonomi berasaskan pengetahuan (k-ekonomi).

Pengerusi Eksekutif Multimedia Technology Enhancement Operations Sdn Bhd (Meteor), Tan Sri Dr Abdullah Sanusi Ahmad, berkata pameran yang bertema 'Menuju Ke Arah Masyarakat E-Pembelajaran' akan menjadi usaha berterusan pihaknya bagi menyediakan landasan terhadap pelaksanaan e-pembelajaran di negara ini.

"Isu dan cabaran berkaitan yang berkaitan pembelajaran maya, pekerja berpengetahuan (k-pekerja), peralatan digital, k-pengurusan dan e-pendidikan adalah antara isu yang akan diberi perhatian dalam pameran ini.

"Kita juga sudah menjemput Perdana Menteri, Datuk Seri Dr Mahathir Mohamad, untuk merasmikan pembukaan dan menyampaikan ucapan e-Learning 2001 yang dijadualkan pada 7 hingga 10 Jun ini di Pusat Persidangan Sunway Pyramid," katanya pada sidang akhbar e-Learning 2001 di sini, hari ini.

Turut hadir, Pengurus Besar Meteor, Mohd Sharif Othman.

Dr Abdullah berkata, pameran itu dijangka menarik antara 7,000 hingga 10,000 pengunjung termasuk peserta tempatan dan luar negara.

Katanya, pameran kali kedua itu mensasarkan penyertaan 300 peserta dalam dan luar negara berbanding 200, tahun lalu.

"Tahun ini kita juga berharap jumlah gerai yang disewa meningkat kepada 100 tapak berbanding 75 pada tahun lalu yang mana antara 20 hingga 40 peratus disasarkan untuk penyertaan syarikat IT," katanya.

Selain pameran, katanya, persidangan yang diadakan bertindak sebagai tempat pertukaran pengetahuan antara penceramah dan peserta untuk berkongsi pengalaman serta pemikiran dalam membangunkan e-learning.

Pada masa sama, katanya, ia dapat menggalakkan inovasi IT di tahap yang lebih tinggi untuk agensi kerajaan, korporat dan industri pendidikan.

Mengenai penyertaan agensi, beliau berkata, sektor kerajaan adalah peserta terbesar membabitkan 70 peratus berdasarkan statistik pameran tahun lalu.

(END)